

21
18. febr.

STARFSREGLUR

fyrir öryggiseftirlit ríkisins.

I. KAFLI

Skyldur starfsmanna eftirlitsins.

1. gr.

Öryggismálastjóri veitir skrifstofu öryggiseftirlitsins í Reykjavík forstöðu og skal vinnutími þar vera svo sem ráðuneytið ákveður. Hann skal safna þar og vinna úr skýrslum öryggiseftirlitsmanna og öryggisskoðunarmanna, hafa umsjón með og bera ábyrgð á öllu því, er varðar eftirlitið og framkvæmd þess, undir yfirstjórn ráðuneytisins. Skal hann sérstaklega gæta þess, að framfylgt sé ákvæðum laga og reglugerða að því er snertir öryggi verkafólks á vinnustöðum.

Öryggismálastjóri ferðast um landið, fylgist með störfum öryggiseftirlitsmanna og öryggisskoðunarmanna, leiðbeinir þeim við störf þeirra og sér um að þeir ræki störf sín vel og samvirkkusamlega.

Öryggismálastjóri semur nauðsynlegar reglur um einstakar greinar eftirlitsins og sér um samningu reglugerða. Hann skal beita sér fyrir auknu samstarfi vinnuveitenda og verkamanna í öryggismálum og stuðla að viðræðufundum milli þessara aðilja um öryggismál. Hann skal beita sér fyrir fræðslu verkamanna í öllu, sem varðar öryggis- og heilbrigðisráðstafanir á vinnustöðum og leita sem nánast samvinnu við lækna um heilbrigðismál. Hann skal beita sér fyrir nauðsynlegri fræðslu trúnaðarmanna verkamanna um öryggismál og bráðabirgðahjálp, ef slys ber að höndum.

Öryggismálastjóri rannsakar skýrslur öryggiseftirlitsmanna og öryggisskoðunarmanna um slys, sem verkamenn verða fyrir við vinnu og leitar ráðstafana, sem verða mættu til að forðast endurtekningu þeirra.

Öryggismálastjóri skal árlega semja skýrslu um störf eftirlitsins, svo og aðrar þær skýrslur og tillögur í öryggismálum, er ráðuneytið leggur fyrir hann að annast.

2. gr.

Öryggiseftirlitsmenn skulu ferðast um landið og hafa á hendi eftirlit með verksmiðjum, vélum og vinnustöðum, sem eftirlitsskyld eru samkvæmt lögum um öryggisráðstafanir á vinnustöðum. Þeir líta eftir, að ákvæðum laganna og reglugerða, sem settar eru samkvæmt þeim, sé fullnægt, og leiðbeina vinnuveitendum um allt það, sem betur mætti fara og miðar að bættum hollustuháttum og öryggi við vinnuna. Þeir skulu benda verkamönnum á hættur þær, sem vinnunni kunna að vera samfara og hvað gera beri til að draga úr hættunni. Þeir skulu fylgjast með því, að óvönum mönnum sé ekki falið starf, sem sérstök hættu getur verið samfara, fyrr en þeir hafa öðlazzt nauðsynlega þjálfun við starfið og er orðið fyllilega ljóst í hverju hættu getur verið fólgin og hvað gera beri til að forðast hana.

Öryggiseftirlitsmenn skulu leitast við að auka samstarf vinnuveitenda og verkamanna í öryggismálum og leiðbeina trúnaðarmönnum verkamanna í starfi þeirra varðandi öryggis- og heilbrigðismál.

Öryggiseftirlitsmenn skulu rannsaka orsakir slysa, sem verkamenn verða fyrir við vinnu og láta öryggismálastjóra í té skýrslu um rannsóknir sínar. Þeir skulu vinna störf sín samkvæmt fyrirmælum öryggismálastjóra og leiðbeina öryggisskoðunarmönnum við störf þeirra.

3. gr.

Öryggisskoðunarmenn hafa einkum eftirlit með losun og lestun skipa og með verkpöllum. Þeir framkvæma auk þess vandaminni skoðanir, sem öryggismálastjóri felur þeim. Þeir vinna störf sín undir umsjá og leiðbeiningum öryggismálastjóra og öryggiseftirlitsmanna.

21

18. febr.

4. gr.

Umdæmissskoðunarmenn eru umboðsmenn öryggiseftirlitsins hver í sínu umdæmi. Þeir framkvæma vandaminni skoðanir eftir því sem öryggismálastjóri felur þeim og hafa eftirlit með losun og lestun skipa og farandvélum í umdæmi sínu. Þeir vinna störf sín undir umsjá og leiðbeiningum öryggismálastjóra, öryggiseftirlitsmanna og öryggisskoðunarmanna.

5. gr.

Komi slys fyrir á vinnustað og sé ekki unnt að ná nægilega snemma til öryggismálastjóra eða öryggiseftirlitsmanna til þess að rannsaka orsakir slyssins, ber umdæmissskoðunarmanni að framkvæma bráðabirgðarannsókn á orsökum slyssins og gefa öryggismálastjóra skýrslu um rannsóknina, svo fljótt sem unnt er, en öryggismálastjóri lætur síðan framkvæma nánari rannsókn, telji hann þess þörf.

6. gr.

Fyrir starf sitt fá umdæmissskoðunarmenn helming eftirlitsgjalda þeirra fyrirtækja, sem þeir skoða. Feli öryggismálastjóri umdæmissskoðunarmanni að framkvæma eftirskoðun vegna umbóta, sem kann að hafa verið krafizt við aðalskoðun, og að gefa út skoðunarvottorð að umbótum loknum, ber honum fyrir það 5 til 20% af eftirlitsgjaldi fyrirtækisins, eftir því sem öryggismálastjóri ákveður hverju sinni.

Umdæmissskoðunarmenn láta öryggismálastjóra í lok hvers árs í té skýrslu um störf sín í þágu eftirlitsins á árinu.

II. KAFLI

Tilhögun eftirlitsins.

7. gr.

Öryggismálastjóri skiptir eftirlitsskyldum fyrirtækjum í flokka og ákveður hversu tíðar skoðanir hvers flokks skuli vera og hvernig skoðunum skuli hagað, þó skulu öll fyrirtæki skoðuð að minnsta kosti einu sinni á ári hverju og skal leitast við að haga eftirlitsferðum svo, að ekki líði lengra en 12 mánuðir milli skoðana.

8. gr.

Eimkatlar, suðukatlar, þrýstiloftshylki og önnur lík tæki, sem ekki er hægt að skoða til hlítar meðan þau eru í notkun, skulu skoðuð þegar rekstur fyrirtækisins liggur niðri, eða á þeim tíma ársins, sem bezt hentar fyrirtækinu að stöðva reksturinn, svo hægt sé að framkvæma skoðunina. Sé ástand slíks tækis þannig, að eftirlitsmaður telji notkun þess varhugaverða, ber honum að láta þegar stöðva reksturinn, svo skoðun geti farið fram. Öryggisloka hylkja með þrýstingi og annan öryggisbúnað þeirra skal skoða og prófa við venjuleg starfsskilyrði.

9. gr.

Við skoðun líta starfsmenn öryggiseftirlitsins eftir því, að öryggisbúnaður allur og hollustuhættir á vinnustöðum séu samkvæmt því, sem ákveðið er í lögum um öryggisráðstafanir á vinnustöðum og reglugerðum settum samkvæmt þeim. Þeir skulu þá jafnframt hafa tal af trúnaðarmanni verkamanna og vinnuveitanda eða umboðsmanni hans.

21 18. febr. Þyki eftirlitsmanni hollustuháttum eða öryggisútbúnaði ábótavant, skal hann krefjast nauðsynlegra umbóta og veita til þeirra hæfilegan frest. Að umbótafresti liðnum skal sami skoðunarmaður framkvæma skoðun á ný. Þurfi eftirlitsmaður að takast langa ferð á hendur vegna slíkrar eftirskoðunar, getur öryggismálastjóri falið umdæmisskoðunarmanni að framkvæma hana og skulu honum þá látni í té nauðsynleg gögn varðandi hina fyrri skoðun, svo hann geti gerla séð hverra umbóta hafði verið krafist.

Að aflokinni hverri skoðun semur starfsmaður skýrslu um árangur skoðunarinnar og skal hún vera í þrítí. Fær atvinnurekandi eða umboðsmaður hans afhent frumritið, en skrifstofa eftirlitsins fær annað afritið, og sá sem skoðunina framkvæmdi og gaf út skýrsluna heldur hinu. Verði umdæmisskoðunarmanni falin eftirskoðun fær hann afrit það, sem skrifstofunni er ætlað og sendir hann skrifstofunni það síðan ásamt skýrslu sinni um eftirskoðunina. Skal vinnuveitandi eða umboðsmaður hans hverju sinni kvitta á skoðunarskýrslu fyrir móttöku hennar, enda hafi hann verið viðstaddur skoðunina.

10. gr.

Að lokinni árlegri skoðun, hafi engar athugasemdir verið gerðar við öryggisbúnað eða hollustuhætti, eða að lokinni eftirskoðun, þegar búið er að framkvæma umbætur þær, sem kunna að hafa verið fyrirskipaðar við aðalskoðun, gefur eftirlitsmaður út skoðunarovottorð ásamt reikningi fyrir eftirlitsgjaldi fyrirtækisins, sem hann afhendir viðkomandi lögreglustjóra (tollstjóranum í Reykjavík) til innheimtu, en hann kvittar fyrir móttöku reikningsins.

11. gr.

Á skrifstofu eftirlitsins í Reykjavík, skal vera spjaldskrá yfir öll eftirlitsskyld fyrirtæki og vinnustöðvar. Skal af henni mega sjá fyrirkomulag véla og tækja, húsa-kost og fyrirkomulag í aðalatriðum. Á spjald hvers fyrirtækis skal jafnan færa árangur hversrar skoðunar í aðalatriðum og hversu margir vinna þar á hverjum tíma. Umdæmisskoðunarmenn skulu hafa afrit af spjaldskrá yfir þau fyrirtæki, sem þeim er falið að skoða í umdæmi sínu.

12. gr.

Skrifstofukostnaður vegna eftirlitsins og ferðakostnaður starfsmanna þess er greiddur úr ríkissjóði samkvæmt fjárveitingu í fjárlögum. Ferðakostnað sinn fá starfsmenn eftirlitsins greiddan samkvæmt reikningum, sem ráðuneytið úrskurðar, og fæðispeninga á ferðum samkvæmt ákvæðum ráðuneytisins.

Ef starfsmenn eftirlitsins ferðast í þágu þess á eigin bifreiðum fá þeir greidda leigu fyrir þær, samkvæmt þar um gildandi reglum ráðuneytisins á hverjum tíma.

13. gr.

Brot gegn starfsreglum þessum varða sektum frá 50—5000 krónum, nema þyngri refsing liggi við samkvæmt öðrum lögum. Sektirnar renna í ríkissjóð.

Mál út af brotum skal farið með að hætti opinberra mála.

Starfsreglur þessar eru hér með settar samkvæmt lögum nr. 23 1. febrúar 1952, um öryggisráðstafanir á vinnustöðum, til þess að öðlast þegar gildi, og birtist til eftirbreytni öllum þeim, sem hlut eiga að máli.

Samgöngumálaráðuneytið, 18. febrúar 1953.

Björn Ólafsson.

Páll Palmason.